



Broj: 05/1-50-13-29-27/12

Sarajevo, 6.9.2012. godine

ZAPISNIK

27. sjednice Nezavisnog odbora Parlamentarne skupštine BiH

Sjednica je održana 6.9.2012., s početkom u 11 sati.

Sjednicu je sazvaio Žiko Krunić, predsjednik Nezavisnog odbora.

Sjednici su prisustvovali: Žiko Krunić, predsjednik Nezavisnog odbora, Bakir Dautbašić, prvi zamjenik predsjednika Nezavisnog odbora, Zijad Kadić, Viktor Dadić, Ljubomir Kuravica, Enes Obralića, Dragan Savić i Stanko Nuić, članovi Nezavisnog odbora.

Opravdano je odsustvovao Mato Jozić, član Nezavisnog odbora.

Osim članova, sjednici su na poziv predsjednika Nezavisnog odbora prisustvovali: Vinko Dumančić, direktor Granične policije BiH, Himzo Selimović, direktor Direkcije za koordinaciju policijskih tijela BiH, i Goran Zubac, direktor Državne agencije za istrage i zaštitu.

Sjednici je prisustvovala Alma Salkić-Mijić, koja je obavljala poslove sekretara Nezavisnog odbora.

Sjednicu su pratili: Dijana Šatara i Senad Zlatar, predstavnici OHR-a, i Zoran Brkić iz Sektora za odnose s javnošću Sekretarijata Parlamentarne skupštine BiH.

Predsjednik Nezavisnog odbora Žiko Krunić konstatirao je da postoji kvorum za rad i otvorio sjednicu.

Nakon prijedloga za izmjenu redoslijeda tačaka dnevnog reda, Nezavisni odbor jednoglasno je usvojio sljedeći

DNEVNI RED

1. Informacija o stanju kriminaliteta u Bosni i Hercegovini, s posebnim osvrtom na organizirani kriminal;
2. Usvajanje Zapisnika 26. sjednice, održane 12. 6. 2012.;
3. Tekuća pitanja.

Ad.1. Informacija o stanju kriminaliteta u Bosni i Hercegovini, s posebnim osvrtom na organizirani kriminal

Predsjednik Nezavisnog odbora u uvodu je istakao da je prilikom zakazivanja sjednice Nezavisnog odbora, uz konsultacije s članovima, od Granične policije BiH, Državne agencije za istrage i zaštitu i Direkcije za koordinaciju policijskih tijela BiH zatraženo da dostave izvještaje o radu. Naglasio je da je, u skladu sa Zakonom o nezavisnim i nadzornim tijelima policijske strukture u Bosni i Hercegovini, Nezavisni odbor nadležan za izbor rukovodstva policijskih agencija BiH kao i predlaganje njihove smjene. Na osnovu te odredbe Nezavisni odbor kroz izvještaje o radu policijskih agencija BiH ima uvid u rad direktora i njihovih zamjenika, bez usvajanja tih izvještaja.

Predložio je da se članovima Nezavisnog odbora prvo obrati direktor Direkcije za koordinaciju policijskih tijela BiH, zatim direktor Državne agencije za istrage i zaštitu i na kraju direktor Granične policije BiH.

Dao je riječ Himzi Selimoviću, direktoru Direkcije za koordinaciju policijskih tijela BiH, koji je upoznao članove Nezavisnog odbora o radu ove direkcije. On je istakao da je osnovni problem s kojim se Direkcija susreće potreba rješavanja trajnog smještaja i neusvajanje predloženih pravilnika u Vijeću ministara BiH. Naglasio je da ima izuzetno dobru saradnju s druge dvije agencije na državnom nivou, ali i s policijskim agencijama susjednih zemalja. Upoznao je članove o tome da je u završnoj fazi provođenje Sporazuma o elektronskoj razmjeni podataka, uz napomenu da njegovo neprovođenje može dovesti do ukidanja bezviznog režima za građane BiH. Naglasio je važnost adekvatne opremljenosti Direkcije kako bi mogla odgovoriti na sigurnosne izazove. Spomenuo je da Direkcija koristi IPA fondove EU i da je u toku realizacija twinning projekta koji se odnosi na prijenos znanja u oblastima za koje je ona nadležna.

Obraćajući se članovima Nezavisnog odbora, Goran Zubac, direktor Državne agencije za istrage i zaštitu, rekao je da je on već uradio sve što je obećao kao kandidat za direktora. Istakao je da Državna agencija za istrage i zaštitu, otkada je on na mjestu direktora, nije više ista. Naglasio je da je uspostavljen sistem subordinacije i koordinacije, te da su međuljudski odnosi u ovoj agenciji na zavidnom nivou. Spomenuo je da je njegov cilj kao direktora SIPA-e podizanje ugleda ove agencije u javnosti. Upoznao je članove Nezavisnog odbora da SIPA istražuje veliki broj predmeta koji se odnose na zloupotrebu položaja, organizirani kriminal i korupciju. Također je spomenuo da SIPA postupa hronološki i da, otkada je on njen direktor, nije bilo nikakvih intervencija. Naglasio je da SIPA trenutno vodi izuzetno složene operativne akcije na istraživanju organiziranog kriminala u saradnji s drugim institucijama BiH. Spomenuo je da su u ovoj godini zaprimljene samo dvije predstavke na rad službenika SIPA-e. On je dalje u svom izlaganju istakao izuzetno uspješnu saradnju s drugim agencijama u BiH. Govoreći o problemima, izdvojio je neadekvatnu zaštitu svjedoka.

Vinko Dumančić, direktor Granične policije BiH, ponovio je u svom izlaganju da postoji uspješna saradnja Granične policije BiH s drugim agencijama u BiH. Naglasio je da Granična policija BiH ima pozitivne revizorske izvještaje. Od problema je naveo da Pravilnik o unutrašnjoj organizaciji i sistematizaciji radnih mjesta dvije godine nije usvojen u Vijeću ministara BiH. Rekao je kako smatra da je potrebno mijenjati Zakon o policijskim službenicima i uskladiti zakone o PIO/MIO Republike Srpske i Federacije Bosne i Hercegovine. Informirao je članove Nezavisnog odbora o štrajku zaposlenih u Graničnoj policiji BiH, s posebnim osvrtom na izjave pojedinih službenika Granične policije BiH koje su objavljene u bh.medijima povodom štrajka, a odnose se na prijetnje građanima da će na granicama biti izloženi dugotrajnom čekanju. Direktor je naglasio da činjenice pokazuju suprotno i da je skraćeno vrijeme čekanja na graničnim prijelazima u BiH.

Na pitanje člana Nezavisnog odbora Enesa Obraliće o tome kakvu saradnju Državna agencija za istrage i zaštitu ima s Tužilaštvom BiH, Goran Zubac istakao je da je saradnja s njegovim dolaskom na mjesto direktora ove agencije podignuta na još veći nivo. Također je rekao da on namjerava tu saradnju kontinuirano unapređivati, te da planira održati sastanke s nadležnima u Tužilaštvu BiH i Sudu BiH. Još je dodao da je SIPA odlučno krenula u istraživanje velikog broja krivičnih djela, a pitanje je da li je Tužilaštvo BiH može pratiti u tim aktivnostima.

Na kraju je predsjednik predložio, a članovi Nezavisnog odbora jednoglasno usvojili **zaključak:**

1. Nezavisni odbor prima k znanju usmenu informaciju o radu Direkcije za koordinaciju policijskih tijela BiH, Državne agencije za istrage i zaštitu i Granične policije BiH.
2. Nezavisni odbor će, u skladu sa usvojenim Planom rada za 2012. godine, do kraja godine održati pojedinačne sastanke s rukovodstvom Direkcije za koordinaciju policijskih tijela BiH, Državne agencije za istrage i zaštitu i Granične policije BiH, na kojima će se u formi zaključaka precizirati njihovi problemi u radu, o čemu će Nezavisni odbor informirati Parlamentarnu skupštinu BiH.

Ad. 2. Usvajanje Zapisnika 26. sjednice, održane 12.6.2012.

Predsjednik Nezavisnog odbora Žiko Krunić otvorio je raspravu o ovoj tački dnevnog reda.

S obzirom da nije bilo primjedbi, Zapisnik 26. sjednice, održane 12. 6. 2012., usvojen je jednoglasno.

Ad.3. Tekuća pitanja

Nije bilo rasprave o ovoj tački dnevnog reda.

Sjednica je završena u 12 sati.

Sekretar
Nezavisnog odbora
Alma Salkić-Mijić

Predsjednik
Nezavisnog odbora
Žiko Krunić